

大正藏第 02 册 No. 0117

## 佛说戒香经 1 卷

No. 117 [Nos. 99(1073), 100(12), 116,125(23.5)]

### 佛说戒香经

西天译经三藏朝散大夫试光禄卿明教大师臣法贤奉， 诏译

如是我闻：

一时，佛在舍卫国祇树给孤独园，与大比丘众俱。尔时，尊者阿难来诣佛所，到已头面礼足，合掌恭敬而白佛言：「世尊！我有少疑欲当启问，唯愿世尊为我解说。我见世间有三种香，所谓根香、花香、子香，此三种香遍一切处，有风而闻，无风亦闻，其香云何？」

尔时，世尊告尊者阿难：「勿作是言，谓此三种之香，遍一切处有风而闻，无风亦闻。此三种香有风无风，遍一切处而非得闻。阿难！汝今欲闻普遍香者，应当谛听，为汝宣说。」

阿难白佛言：「世尊！我今乐闻，唯愿宣说。」

佛告阿难：「有风无风香遍十方者，世间若有近事男、近事女，持佛净戒行诸善法，谓不杀、不盗、不淫、不妄及不饮酒。是近事男、近事女，如是戒香遍闻十方，而彼十方咸皆称赞，而作是言：『于某城中有如是近事男女，持佛净戒行诸善法，谓不杀、不盗、不淫、不妄及不饮酒等。』具此戒法，是人获如是之香，有风无风遍闻十方，咸皆称赞而得爱敬。」

尔时，世尊而说颂曰：

「世间所有诸花果，	乃至沈檀龙麝香，
如是等香非遍闻，	唯闻戒香遍一切。
旃檀麝金与苏合，	优钵罗并摩隶花，

如是诸妙花香中，        唯有戒香而最上。  
所有世间沈檀等，        其香微少非遍闻，  
若人持佛净戒香，        诸天普闻皆爱敬。  
如是具足清净戒，        乃至常行诸善法，  
是人能解世间缚，        所有诸魔常远离。」

尔时，尊者阿难及比丘众，闻佛语已，欢喜信受，礼佛而退。

## 佛说戒香经

---

【经文信息】大正藏第 02 册 No. 0117 佛说戒香经

【版本记录】CBETA 电子佛典 Rev. 1.10 (Big5)，完成日期：2010/02/26

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供 / 张文明大德二校，阎学新大德输入，北美某大德提供，法雨道场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】

---